

Jan Malink

W lěće 2007 wumrě dr. Měrcin Völkel, kotryž bě Maćicu Serbsku přez 16 lěta nawjedował. Hišće džensa myslu z hłubokim wobžarowanjom na to, zo so jemu na smjertnym wječoru Myto Ćišinskeho, kotrež by jemu kaž žanomu druhemu přistało, zapowě. Hižo dlěši čas bě wo to prosył, zo smě jako předsyda wotstupić, tola na naležne próstwy předsydstwa wobchowa zastojnstwo hač do kónca. Na tutym městnje mamy na njeho z džakownosću spominać.

Po jeho smjerći měješe so prašenje naslědnistwa rozrisać. Powšitkownje so mjenješe, zo by moja mandželska měla tute zastojnstwo na so wzać, wšako słušeše k najaktiwnišim čłonom Maćicy a přez wšitke lěta po wozrodženju do jeho předsydstwa. W swójbje sej wšo dokładnje přemyslowachmoj. W rezultaće připrajich ja, zo bych na chwilu předsydstwo přewzał, jeli by so hłowna zhromadźizna tak rozsudźila.

Tak so 29. měrca 2008 jako předsyda wuzwolich. Wědźach, zo budže zastojnstwo ćežke břemjo, dokelž dyrbjach je zarjadować do hižo dosć napjelnjeneje protyki. Nimo Serbskeje superintendentury mějach tež nawod Michałskeje wosady na starosci. K tomu přińdžechu prócowanja wo přewzace pěstowarnje we Wuricach do cyrkwinskeho nošerstwa, kotrež so 2009 poradzi a dozhotowjenje nowych serbskich spěwarskich, kiž mějachu 2010 w Ludowym nakładnistwje Domowina wuńć. Institutej běch přilubił wudžělanje wjacorych artiklow za Kulturny leksikon. Swójbne položenje so ćežkeho schorjenja naju syna dla runje w tutym času přiwótri.

Měrcin Völkel bě słowjanske zwiski Maćicy z wulkim zasadženjom pěstował, nawjazawši na Michała Hórnik a jeho cyrilo-metodiske skutkowanje. To njemóžach tak dale wjesć, běch pak džakowny, zo Jurij Łušćanski tutón nadawk přewza. Džakowny sym za posedženja předsydstwa, kotrež kóždy druhi měsac mějachmy a w kotrychž w zakładnej harmoniji naležnosće towarstwa rozpominachmy.

Zo by Maćica swojemu nadawkej wotpowědowała, so přiwobroćić kubłanju a spěchowanju dorosta, załožichu so na mój namjet tři dorostowe myta: Hórnikowe a Šwjelowe za gymnazistow a Mukowe za studentow. Myta so hišće džensa spožča a njesu swoje płody. Jěwa Marja Čornakec, kotraž bě za wšitke personalije přeco přěnja adresa, mje w lěće 2009 na to skedźbni, zo mam so prawje bórže k fararjej Salowskemu do Chrósćic podać, kotryž ma wažnu wěc ze mnu dorěčeć. Mějo so po jeje słowach zeńdžech so z hižo ćežko chorym duchownym bratrom, kiž ze mnu swoje knižne a pjenježne wotkazanje za Maćicu dowobřeča.

Po wosom lětach přewza Jurij Łušćanski předsydstwo, po nim dr. Anja Pohončowa. Maćica Serbska steji 175 lěta w serbskim žiwjenju. Njeh jej njewusaknu mysle a skutki za naš serbski lud.